

摘藻堂四庫全書薈要

集部

欽定四庫全書薈要卷一萬三千九百三十八

集部

白氏長慶集卷八

唐白居易撰

閒適四

古調詩五言凡五十七首

長慶二年七月自中書舍人出守杭州路次藍

溪作

自此後詩俱赴杭州時作

太原一男子自顧庸且鄙老逢不次恩洗拔出泥滓既
居可言地願助朝廷理伏閤三上章慙愚不稱旨聖人

存大體優貸容不死鳳詔停舍人魚書除刺史寘懷齊
寵辱委順隨行止我自得此心於今十年矣餘杭乃名
郡郡郭臨江江詳子切已想海門山潮聲未入耳昔子貞

元末羈旅曾遊此甚覺太守尊亦諳魚酒美因生江海
興每羨滄浪水尚擬拂衣行況今兼祿仕青山峯巒接
白日煙塵起東道既不通改轅遂南指自秦窮楚越浩
蕩五千里間有賢主人而多好山水是行頗為愜所歷
良可紀策馬渡藍溪勝遊從此始

初出城留別

朝從紫禁歸暮出青門去勿言城東陌便是江南路揚
鞭簇車馬揮手辭親故我生本無鄉心安是歸處

過駱山人野居小池

駱生棄官居
此二十餘年

茅覆環堵亭泉添方丈沼紅芳照水荷白頸觀魚鳥拳
石苔蒼翠尺波烟杳眇但問有意無勿論池大小門前
車馬路奔走無昏曉名利驅人心賢愚同擾擾善哉駱
處士安置身心了何乃獨多君丘園居者少

宿清源寺

往謫潯陽去夜憇朝溪曲今為錢塘行重經茲寺宿爾
來幾何歲溪草二八綠不見舊房僧蒼然新樹木虛空
走日月世界遷陵谷我生寄其間孰能逃倚伏隨緣又
南去好住東廊竹

宿藍溪對月

昨夜鳳池頭今夜藍溪口明月本無心行人自回首新
秋松影下半夜鐘聲後清影不宜昏聊將茶代酒

自望秦赴五松驛馬上偶睡睡覺成吟

長途發已久前館行未至體倦目已昏瞋

切克盍

然遂成

睡右袂尚垂鞭左手暫委轡忽覺問僕夫纔行百步地
形神分處所遲速相乖異馬上幾多時夢中無限事誠
哉達人語百齡同一寐

鄧州路中作

蕭蕭誰家村秋梨葉半折漠漠誰家園秋韭花初白路
逢故里物使我嗟行役不歸渭北村又作江南客去鄉

徒自苦濟世終無益自問波上萍何如澗中石

朱藤杖紫驄馬吟

拄上山之上騎下山之下江州去日朱藤杖忠州歸日
紫驄馬天生二物濟我窮我生合是栖栖者

桐樹館重題

堦前下馬時梁上題詩處慘澹病使君蕭疎老松樹自
嗟還自哂又向杭州去

過紫霞蘭若

我愛此山頭及此三登歷紫霞舊精舍寥落空泉石朝
市日喧隘雲林長悄寂猶存住寺僧肯有歸山客

感舊紗帽

帽即故李
侍郎所贈

昔君烏紗帽贈我白頭翁帽今在頂上君已歸泉中物
故猶堪用人亡不可逢岐山今夜月墳樹正秋風

思竹窓

不憶西省松不憶南宮菊

西省大
院有松
南宮本
廳有菊

惟憶新昌堂

蕭蕭北窓竹窓間枕筆在來後何人宿

馬上作

處世非不遇榮身頗有餘勲為上柱國爵乃朝大夫自
問有何才兩入承明廬又問有何政再駕朱輪車矧予
東山人自性朴且疎彈琴復有酒但慕嵇阮徒閭被鄉
里薦悞上賢能書一列朝士籍遂為世網拘高有罾繳
憂下有陷穽虞每覺宇宙窄未嘗心體舒蹉跎二十年
領下生白鬚何言左遷去尚獲專城居杭州五千里往
若投淵魚雖未脫簪組且來泛江湖吳中多詩人亦不

少酒沽高聲咏篇什大笑飛杯盃五十未全老尚可且
歡娛用茲送日月君以為何如秋風起江上白日落路
隅回首語五馬去矣勿踟躕

秋蝶

秋花紫蒙蒙秋蝶黃茸茸

而中切

花低蝶新小飛戲叢西

東日暮涼風來紛紛花落叢夜深白露冷蝶已死叢中
朝生夕已死氣類各相從不見千年鶴多棲百丈松

登商山最高頂

高高此山頂四望唯煙雲下有一條路通達楚與秦或
名誘其心或利牽其身乘者與負者來去何紛紜我亦
斯人徒未能出囂塵七年三往復何得笑他人

枯桑

道傍老枯樹枯來非一朝皮黃外尚活心黑中先焦似
有多憂者非因外火燒

山路偶興

筋力未全衰僕馬不至弱又多山水趣心賞非寂寞捫

蘿上煙嶺跼石穿雲壑谷鳥晚仍啼洞花秋不落提籠
復攜榼遇勝時停泊泉憇茶數甌嵐行酒一酌獨吟還
獨笑此興殊未惡假使在城時終年有何樂

山雉

五步一啄草十步一飲水適性遂其生時哉山梁雉梁
上無罾繳梁下無鷹鷂雄與羣雛皆得終天年嗟嗟
籠下雞及彼池中雁既有稻粱恩必有犧牲患

初下漢江舟中作寄兩省給舍

秋水浙紅粒朝煙烹白鱗一食飽至夜一卧安達晨
無朝謁勞夜無直宿勤不知兩掖客何似扁舟人尚想
到郡日且稱守土臣猶須副憂寄恤隱安疲民暮年庶
報政三年當退身終使滄浪水濯吾纓上塵

自蜀江至洞庭湖口有感而作

江從西南來浩浩無旦夕長波逐若瀉連山鑿如劈千
年不壅潰萬姓無墊溺不爾民為魚大哉禹之績導岷
切彌鄰既艱遠距海無咫尺胡為不訖功湖水斯委積洞

庭與青草大小兩相敵混合萬丈深森

同渺

茫千里白每

歲秋夏時浩大吞七澤水族窟穴多農人土地窄我今
尚嗟嘆禹豈不愛惜邈未究其由想古觀遺跡疑此苗
人頑恃險不終役帝亦無奈何留患與今昔水流天地
內如身有血脈滯則為疽疣治之在鍼石安得禹復生
為唐水官伯手提倚天劍重來親指畫疏河似剪紙決
壅如裂帛滲作膏腴田蹋平魚鼈宅龍宮變閭里水府
生禾麥坐添百萬戶書我司徒籍

初領郡政衙退登東樓作

自此後詩到杭州後作

鰥惇心所念簡牘手自操何言符竹貴不免州縣勞賴
是餘杭郡臺榭遶官曹凌晨親政事向晚恣遊遨山冷
微有雪波平未生濤水心如鏡面千里無纖毫直下江
最濶近東樓更高煩襟與滯念一望皆遁逃

清調吟

索索風戒寒沉沉日藏耀勸君飲濁醪聽我吟清調芳
節變窮陰朝光成夕照與君生此世不合長年少今晨

從此遊明日安能料若不結跏禪即須開口笑

狂歌詞

明月照君席白露霑我衣勸君酒杯滿聽我狂歌詞五
十已後衰二十已前癡晝夜又分半其間幾何時生前
不歡樂死後有餘資焉用黃墟下珠衾玉匣為

郡亭

平旦起視事亭午卧掩關除親簿領外多在琴書前況
有虛白亭坐見海門山潮來一凭檻賓至一開筵終朝

對雲水有時聽管絃持此聊過日非忙亦非閒山林太
寂寞朝闕空喧煩惟茲郡閤內囂靜得中間

詠懷

昔為鳳閣郎今為二千石自覺不如今人言不如昔昔
雖居近密終日多憂惕有詩不敢吟有酒不敢喫今雖
在疏遠竟歲無牽役飽食坐終朝長歌醉通夕人生百
年內疾速如過隙先務身安閒次要心歡適事有得而
失物有損而益所以見道人觀心不觀跡

立春後五日

立春後五日春態紛婀娜烏可切娜奴可切白日斜漸長碧雲

低欲隨殘冰折玉片新萼排紅顥遇物盡欣欣愛春非
獨我迎芳後園立就暖前簷坐還有惆悵心欲別紅爐
火

郡中即事

漫漫潮初平熙熙春日空濶遠江山清明好天氣外
有適意物中無繫心事數篇對竹吟一杯望雲醉行攜

杖扶力卧讀書取睡久養病形骸深諳間氣味遙思九
城陌擾擾趨名利今朝是雙日朝謁多軒騎寵者防悔
尤權者懷憂畏為報高車蓋恐非真富貴

郡齋暇日辱常州陳郎中使君早春晚坐水西
館書事詩十六韻見寄亦以十六韻酬之

新年多暇日晏起褰簾坐睡足心更慵日高頭未裹徐
傾下藥酒稍熱煎茶火誰伴寂寥身無絃琴在左遙思
毘陵官春深物媚娜波拂黃柳梢風搖白梅朵衙門排

曉戟鈴閣開朝鎖太守水西來朱衣垂素舸

賈我切

良辰

不易得佳會無由果五馬正相望雙魚忽前墮魚中獲

瑰寶持翫何磊砢

郎果切

一百六十言字字靈珠顆

苦果切

上申心款曲下叙時軼

苦紺切

軻

口我切

才富不如君道孤

還似我敢辭官遠慢且貴身安妥勿復問榮枯冥心無
不可

官舍

高樹換新葉陰陰覆地隅何言太守宅有似幽人居太

守卧其下閒慵兩有餘起嘗一甌茗行讀一卷書早梅
結青實殘櫻落紅珠稚女弄庭果嬉戲一作牽人裾是
日晚彌靜巢禽不相呼嘖嘖護兒鵲啞啞母子烏豈惟
云鳥爾吾亦引吾鵲

吾鵲

吾鵲字阿羅阿羅纔七齡嗟吾不才子憐爾無弟兄撫
養雖驕駭性識頗聰明學母畫眉樣効吾詠詩聲我齒
今欲墮汝齒昨始生我頭髮盡落汝頂髻初成老幼不

相待父哀汝孩嬰緬想古人心慈愛亦不輕蔡邕念文
姬于公歎緹縈敢求得汝力但未忘父情

題小橋前新竹招客

雁齒小紅橋垂簷低白屋橋前何所有萋萋新生竹皮
開折褐錦節露抽青玉筠翠如可飡粉霜不忍觸間吟
聲未已幽翫心難足管領好風煙輕欺凡草木誰能有
月夜伴我林中宿為君傾一杯狂歌竹枝曲

病中逢秋招客夜酌

不見詩酒客卧來半月餘合和新藥草尋檢舊方書晚
霽煙景度早涼窓戶虛雪生衰鬢久秋入病心初卧簟
蘄竹涼風襟邛葛踈夜來身校健小飲復何如

食飽

食飽拂枕卧睡足起間吟淺酌一杯酒緩彈數聲琴既
可暢情性亦足傲光陰誰知名利盡無復長安心

嚴十八郎中在郡日改制東南樓因名清輝未
立標榜徵歸郎署予既到郡性愛樓居宴遊

其間頗有幽致聊成十韻兼戲寄嚴

嚴郎制茲樓立名曰清輝未及署花榜遽徵還粉闥去
來三四年塵土登者稀今春新太守洒掃施簾幃院柳
煙婀娜簷花雪霏微看山倚前戶待月闌東扉碧窻憂
瑤瑟朱闌飄舞衣燒香捲幕坐風燕雙雙飛君作不得
住我來幸因依始知天地間靈境有所歸

南亭對酒送春

含桃實已落紅薇花尚薰冉冉三月盡晚鶯城上聞獨

持一杯酒南亭送殘春半酣忽長歌歌中何所云云我
五十餘未是苦老人刺史二千石亦不為賤貧天下三
品官多老於我身同年登第者零落無一分親故半為
鬼僮僕多見孫念此聊自解逢酒且歡欣

翫新庭樹因詠所懷

靄靄四月初新樹葉成陰動搖風景麗盖覆庭院深下
有無事人竟日此幽尋豈惟翫時物亦可開煩襟時與
道人語或聽詩客吟度春足芳色入夜多鳴禽偶得幽

間境遂忘塵俗心始知真隱者不必在山林

仲夏齋戒月

仲夏齋戒月三旬斷腥羶自覺心骨爽行起身翩翩始
知絕粒人四體更輕便初能脫病患久必成神仙禦寇
馭冷風赤松游紫煙常疑此說謬今乃知其然我年過
半百氣衰神不全已垂兩鬢絲難補三丹田但減葷血
味稍結清淨緣脫巾且修養聊以終天年

除官去未間

除官去未間半月恣游討朝尋霞外寺暮宿波上島新
樹少於松平湖半連草躋攀有次第賞翫無昏早有時
騎馬醉兀兀冥天造窮通與生死其奈吾懷抱江山信
為美齒髮行將老在郡誠未厭歸鄉去亦好

三年為刺史二首

三年為刺史無政在人口惟向郡城中題詩十餘首慙
非甘棠詠豈有人思否

三年為刺史飲水復食藥惟向天竺山取得兩片石此

抵有千金無乃傷清白

別萱桂

使君竟不住萱桂徒栽種桂有留人名萱無忘憂用不
如江畔月步步來相送

自餘杭歸宿淮口作

為郡已多暇猶少勤吏職罷郡更安閒無所勞心力舟
行明月下夜泊清淮北豈止吾一身舉家同燕息三年
請祿俸頗有餘衣食乃至僮僕間皆無凍餒色行行弄

雲水步步近鄉國
妻子在我前
琴書在吾側
此外吾不知於焉心自得

舟中李山人訪宿

日暮舟悄悄
煙生水沉沉
何以延宿客
夜酒與秋琴
來客道門子
來自松高岑
軒軒舉雲貌
豁豁開清襟
得意言語斷
入絃滋味深
默然相顧哂
心適而忘心

洛下卜居

三年典郡歸
所得非金帛
天竺石兩片
華亭鶴一隻
飲

啄供稻粱色裏用茵席誠知是勞費其奈心愛惜遠從
餘杭郭同到洛陽陌下擔拂雲根開籠展霜翮貞姿不
可雜高性宜其適遂就無塵坊仍求有水宅東南得幽
境樹老寒泉碧池畔多竹陰門前少人跡未請中庶祿
且脫雙驂易

買履道宅價不足
因以兩馬償之

豈獨為身謀安吾鶴與

石

洛中偶作

自此後在
東都作

五年職翰林四年蒞潯陽一年巴郡守半年南宮郎二

年直綸閣三年刺史堂凡此十五載有詩千餘章境興
周萬象土風備四方獨無洛中作能不心悵悵魯堂切今
為春官長始來遊此鄉徘徊伊澗上睥睨嵩少傍遇物
輒一詠一詠傾一觴筆下成釋憾卷中同補亡往往顧
自哂眼昏鬢蒼蒼不知老將至猶自放詩狂

贈蘇少府

籍甚二十年今日方款顏相送嵩洛下論心杯酒間何
為懶出入府寮多閑關蒼髮彼此老白日尋常間朝欲

攜手出暮思聯騎還何當挈一榼同宿龍門山

移家入新宅

移家入新宅罷郡有餘資既可避燥濕復免憂寒饑疾
平未還假官閒得分司幸有俸祿在而無職役羈清旦
盥漱畢開軒卷簾幃家人及雞犬隨我亦熙熙取興不
過酒放情或作詩何必苦修道此即是無為外累信已
遣中懷時有思有思一何遠默坐低雙眉十載囚竄客
萬里征戍兒春朝鎖籠鳥冬夜支牀龜驛馬走四蹄痛

酸無歇期磴

魚胃切磨也

牛封兩目昏閉何人知誰能脫放

去四散任所之各得適其性如吾今日時

琴

置琴曲几上慵坐但含情何煩故揮弄風絃自有聲

鶴

人各有所好物固無常宜誰謂爾能舞不如閒立時

自詠

夜鏡隱白髮朝酒發紅顏可憐假年少自笑須臾間朱

砂賤如土不解燒為丹玄鬢化為雪未聞休得官咄哉
箇丈夫心性何墮頑但遇詩與酒便忘寢與飧高聲發
一吟似得詩中仙引滿飲一杯盡忘身外緣昔有醉先
生席地而幕天于今居處在許我當中眠眠罷又一酌
酌罷又一篇回面顧妻子生計方落然誠知此事非又
過知非年豈不欲自改改即心不安且向安處去其餘
皆老閒

林下閒步寄皇甫庶子

扶杖起病初策馬力未任既懶出門去亦無客來尋以
此遂成間間步遠園林天曉煙景淡樹寒鳥雀深一酌
池上酒數聲竹間吟寄言東曹長當知幽獨心

晏起

鳥鳴庭樹上日照屋簷時老去慵轉極寒來起猶遲厚
薄被適性高低枕得宜神安體穩暖此味何人知睡足
仰頭坐兀然無所思如未鑿七竅若都遺四肢緬想長
安客早朝霜滿衣彼此各自適不知誰是非

池畔二首

結構池西廊疏理池東樹此意人不知欲為待月處

持刀剗

古火切

密竹竹少風來多此意人不會欲令池有

波

春葺新居

江州司馬日忠州刺史時栽松滿後院種柳蔭前墀彼
皆非吾土栽種尚忘疲況茲是我宅葺藝固其宜平旦
領僕使乘春親指揮移花夾暖室徙竹覆寒池池水變

綠色池芳動清輝尋芳弄水坐盡日心熙熙一物苟可
適萬緣都若遺設如宅門外有事吾不知

贈言

捧籛獻千金彼金何足道臨觴贈一言此言真可寶流
光我已晚適意君不早況君春風面柔促如芳草二十
方長成三十向衰老鏡中桃李色不得十年好胡為坐
脈脈不肯傾懷抱

泛春池

白蘋湘渚曲綠篠

先了切

剡溪口各在天一涯信美非吾

有何如此庭內水竹交左右霜竹百千竿煙波六七畝

泓澄動階砌淡泞

支呂切

映戶牖蛇皮細有紋鏡面清無

垢主人過橋來雙童扶一叟恐污清冷波塵纓先抖擻

波上一葉舟舟中一樽酒酒開舟不繫去去隨所偶或

遶蒲浦前或泊桃島後未撥落杯花低衝拂面柳半酣


迷所在倚榜兀回首不知此何處復是人寰否誰知始

疏鑿幾主相傳受楊家去云遠田氏將非久天與愛水

人終焉落吾手

此池始楊常侍開鑿中間田氏為主
予今有之蒲浦桃島皆池上所有

白氏長慶集卷八



總校官庶吉士臣張能照
校對官編修臣莫瞻某
騰錄監生臣平達

欽定四庫全書薈要

集部

白氏長慶集卷

九至
十一

詳校官助教臣常循



欽定四庫全書薈要卷一萬三千九百三十九

集部

白氏長慶集卷九

唐白居易撰

感傷一 古調詩五言凡五十五首

西明寺牡丹花時憶元九

前年題名處今日看花來一作芸香吏三見牡丹開豈
獨花堪惜方知老閭催何況尋花伴東都去未迴詎知
紅芳側春盡思悠哉

傷楊弘貞

顏子昔短命仲尼惜其賢楊生亦好學不幸復徒然

一作

然今復誰識天地意獨與龜鶴

一作蛇年

權攝昭應早秋書事寄元拾遺兼呈李司錄

夏閏秋候早七月風騷騷渭川煙景晚驪山宮殿高
丹殿子司諫赤縣我徒勞相去半日程不得同游遨到官
來十日覽鏡生二毛可憐趨走吏塵土滿青袍郵傳擁
兩驛簿書堆六曹為問綱紀掾何必使鉛刀

新栽竹

佐邑意不適，閉門秋草生。
何以娛野性？種竹百餘莖。
見此溪上色，憶得山中情。
有時公事暇，盡日繞欄行。
勿言根未固，勿言陰未成。
已覺庭宇內，稍稍有餘清。
最愛近牕卧，秋風枝有聲。

秋霖中過尹縱之仙遊山居

慘慘八月暮，連連三日霖。
邑居尚愁寂，況乃在山林。
林下有志士，苦學惜光陰。
歲晚千萬慮，併入方寸心。
巖鳥

共旅宿草蟲伴愁吟秋天床席冷雨夜燈火深憐君寂寞意攜酒一相尋

寄江南兄弟

分散骨肉戀趨馳利名牽一奔塵埃馬一汎風波船忽憶分手時惘然秋風前別來朝復夕積日成七年花落城中池春深江上天登樓東南望鳥滅煙蒼然相去復幾許道里近三千平地猶難見况乃隔山川

曲江早秋

三年作

秋波紅蓼水之照青蕪岬獨信馬蹄行曲江池四畔早
涼晴後至殘暮暝來散方喜炎燠清復嗟時節換我年
三十六冉冉昏復旦人壽七十稀七十新過半且當對
酒笑勿復臨風嘆

寄題盤屋廳前雙松

兩松自仙遊
山移植縣廳

憶昨為吏日折腰多苦辛歸家不自適無計慰心神手
栽兩樹松聊以當嘉賓春來日一往生意漸欣欣清韻
度秋在綠葦隨日新始憐澗底色不憶城中春有時晝

掩關雙影對一身盡日不寂寞意中如三人忽奉宣室
詔徵為文苑臣閒來一惆悵長似別交親早知煙翠前
攀翫不逡巡悔從白雲裏移爾落囂塵

翰林院中感秋懷王質夫

王居仙
遊山

何處感時節新蟬禁中聞宮槐有秋意風夕花紛紛寄
跡鴛鴦行歸心鷗鶴羣惟有王居士知予憶白雲何日
仙遊寺潭前秋見君

禁中月

海上明月出禁中清夜長東南樓殿白稍稍上宮牆淨
落金塘水明浮玉砌霜不比人間見塵土污清光

贈賣松者

一束蒼蒼色如從澗底來斲掘經幾日枝葉滿塵埃不
買非他意城中無地栽

初見白髮

白髮生一莖朝來明鏡裏勿言一莖少滿頭從此始青
山方遠別黃綬初從仕未料容鬢間蹉跎忽如此

別元九後詠所懷

零落桐葉雨蕭條槿花風悠悠早秋意生此幽閒中況
與故人別中懷正無_{徂紅切}怍_{樂也}勿云不相送心到青門
東相知豈在多但問同不同同心一人去坐覺長安空

禁中秋宿

風翻朱裏幕雨冷通中枕耿耿背斜燈秋牀一人寢

早秋曲江感懷

離離暑雲散嫋嫋涼風起池上秋又來荷花半成子朱

顏易消歇白日無窮已人壽不如山年光急於水青蕪
與紅蓼歲歲秋相似去歲此悲秋今我復來此

寄元九

身為近密拘心為名檢縛月夜與花時少逢杯酒樂唯
有元夫子間來同一酌把手或酣歌展看時笑謔今春
除御史前月之東洛別來未開顏塵埃滿樽杓蕙風晚
香盡槐雨餘花落秋意一蕭條離容兩寂寞况隨白日
老共負青山約誰識相念心羈鷹與籠鶴

春暮寄元九

梨花結成實燕卵化為鷓時物又若此道情復何如但
覺日月促不嗟年歲徂浮生都是夢老小亦何殊唯與
故人別江陵初謫居時時一相見此意未全除

早梳頭

夜沐早梳頭牕明秋鏡曉颯然握中髮一沐知一少年
事漸蹉跎世緣方繳繞不學空門法老病何由了未得
無生心白頭亦為天

出關路

山川函谷路塵土游子顏蕭條去國意秋風生故關
別舍弟後月餘

悄悄初別後去住兩盤桓行子孤燈店居人明月軒平
生共貧苦未必日成歡及此暫為別懷抱已憂煩況是
庭葉盡復思山路寒如何為不念馬瘦衣裳單

新豐路逢故人

塵土長路晚風煙廢宮秋相逢立馬語盡日此橋頭知

君不得意鬱鬱來西遊惆悵新豐店何人識馬周

金鑾子晬日

晬將遂切子
生一歲曰晬

行年欲四十有女曰金鑾生來始周歲學坐未能言慙
非達者懷未免俗情憐從此累身外徒云慰目前若無
天折患則有婚嫁牽使我歸山計應遲十五年

青龍寺早夏

塵埃經小雨地高倚長坡日西寺門外景氣含清和間
有老僧立靜無凡客過殘鷓鴣意思盡新葉陰涼多春去

來幾日夏雲忽塞我朝朝感時節年鬢闇蹉跎胡為戀
朝市不去歸煙蘿青山寸步地自問心如何

秋題牡丹叢

晚叢白雲夕哀葉涼風朝紅艷久已歇碧芳今亦銷幽
人坐相對心事共蕭條

勸酒寄元九

薤葉有朝露槿枝無宿花君今亦如此促促生有涯既
不逐禪僧林下學楞伽又不隨道士山中煉丹砂百年

夜分半一歲春無多何不飲美酒胡然自悲嗟俗號消
愁藥神速無以加一杯驅世慮兩杯反天和三杯即酩
酊或醉任狂歌陶陶復兀兀吾孰知其他況在名利途
平生有風波深心藏陷穽巧言織網羅舉目非不見不
醉欲如何

曲江感秋

五年作

沙草新雨地坼柳涼風枝三年感秋思併在曲江池早
蟬已噤連條切晚荷復離披前秋去秋思一一生

此時昔人三十二秋興已云悲我今欲四十秋懷亦可
知歲月不虛設此身隨日衰闇老不自覺直到鬢成絲
酬張太祝晚秋卧病見寄

高才淹禮寺短羽翔禁林西街居處遠北闕官曹深君
病不來訪我忙難往尋差池終日別寥落經年心露濕
綠蕪地月寒紅樹陰况茲獨愁夕聞彼相思吟上言歡
笑阻下嗟時歲侵容衰晚窻鏡思苦秋絃琴一章錦繡
段八韻瓊瑤音何以報珍重慙無雙南金

立秋日曲江憶元九

下馬柳陰下獨上堤上行故人千萬里新蟬三兩聲城
中曲江水江上江陵城兩地新愁思應同此日情

早朝賀雪寄陳山人

長安盈尺雪早朝賀君喜將赴銀臺門始出新昌里上
堤馬蹄滑中路蠟燭死十里向北行寒風吹破耳待漏
午門外候對三殿裏鬚鬢凍生冰衣裳冷如水忽思仙
遊谷間謝陳居士暖覆褐裘眠日高應未起

初與元九別後忽夢見之及寤而書適至兼寄

桐花詩悵然感懷因以此寄

元九初
謫江陵

永壽寺中語新昌坊北分歸來數行淚悲事不悲君悠
悠藍田路自去無消息計君食宿程已過商山北昨夜
雲四散千里同月色曉來夢見君應是君相憶夢中握
君手問君意何如君言苦相憶無人可寄書覺來未及
說叩門聲簌簌言是商州使送君書一封枕上忽驚起
顛倒著衣裳開緘見手札一紙十三行上論遷謫心下

說離別腸心腸都未盡不暇叙炎涼云作此書夜夜宿
商州東獨對孤燈坐陽城山館中夜深作書畢山月向
西斜月前何所有一樹紫桐花桐花半落時復道正相
思殷勤書背後兼寄桐花詩桐花詩八韻思緒一何深
以我今朝意憶君此夜心一章一遍讀一句十回吟珍
重八十字字字化為金

和元九悼往

感舊蚊
蚋作

美人別君去自去無處尋舊物零落盡此情安可任唯

有顧

胡結切

紗幌塵埃日夜侵馨香與顏色不似舊時深

透影燈耿耿籠光月沉沉中有孤眠客秋涼生夜衾舊
宅牡丹院新墳松木林夢中咸陽淚覺後江陵心含此
隔年恨發為中夜吟無論君自感聞者欲沾巾

重到渭江舊居

舊居清渭曲開門當蔡渡十年方一還幾欲迷歸路追
思昔日行感傷故游處挿柳作高林種桃成老樹因驚
成人者盡是舊童孺試問舊老人半為遠村墓浮生同

過客前後遞來去白日如弄珠出入光不住人物日改
變舉目悲所遇回念念我身安得不哀暮朱顏銷不歇
白髮生無數唯有山門外三峯色如故

白髮

白髮知時節閨與我有期今朝日陽裏梳落數莖絲家
人不慣見憫默為我悲我云何足怪此意爾不知凡人
年三十外壯中已衰但思寢食味已減二十時況我年
四十本來形貌羸書魔昏兩眼酒病沉四肢親愛日零

落在者仍別離身心久如此白髮生已遲由來生老死
三病長相隨除却念無生人間無藥治

秋日

池殘寥落水牕下悠揚日嫋嫋秋風多槐花半成實下
有獨立人年來四十一

將之饒州江浦夜泊

明月滿深浦愁人獨卧舟煩寃寢不得夏夜長於秋苦
乏衣食資遠為江海游光陰坐遲暮鄉國行阻修身病

向鄱陽家貧寄徐州前事與後事豈堪心併憂憂來起
長望但見江水流雲樹藹蒼蒼煙波淡悠悠故園迷處
所一望堪白頭

思歸

時初為
校書郎

養無晨昏膳隱無伏臘資遂求及親祿僂來京師薄
俸未及親別家已經時冬積溫席戀春違采蘭期夏至
一陰生稍稍夕漏遲塊然抱愁者長夜獨先知悠悠鄉
關路夢去身不隨坐惜時節變蟬鳴槐花枝

冀城北原作

野色何莽蒼

去聲

秋聲亦蕭疎風吹黃埃起落日驅征車

何代此開國封疆百里餘古今不相待朝市無常居昔
人城邑中今變為丘墟昔人墓田中今化為里閭廢興
相催促日月互居諸世變無遺風焉能知其初行人十
載後懷古空躊躇

客路感秋寄明準上人

日暮天地冷雨霽山河清長風從西來草木凝秋聲已

感歲倏忽復傷物凋零孰能不懽悽天時牽人情借問
空門子何法易修行使我忘得心不教煩惱生

游襄陽懷孟浩然

楚山碧巖巖漢水碧湯湯秀氣結成象孟氏之文章今
我諷遺文思人至其鄉清風無人繼日暮空襄陽南望
鹿門山藹若有餘芳舊隱不知處雲深樹蒼蒼

秋暮西歸途中書情

耿耿旅燈下愁多常少眠思鄉貴早發發在雞鳴前九

月草木落平蕪連遠山秋陰和曙色萬木蒼蒼然去秋
偶東遊今秋始西旋馬瘦衣裳破別家來二年憶歸復
愁歸歸無一囊錢心雖非蘭膏安得不自然

秋懷

月出照北堂光華滿堦墀涼風從西至草木日夜衰桐
柳減綠色蕙蘭消碧滋感物私自念我心亦如之安得
長少壯盛衰迫天時人生如石火為樂長苦遲

別楊穎士盧克柔殷堯藩

倦鳥暮歸林浮雲晴歸山獨有行路子悠悠不知還人
生苦營營終日羣動間所務雖不同同歸於不間扁舟
來楚鄉足馬往秦關離憂繞心曲宛轉如循環且持一
杯酒聊以開愁顏

題贈定光上人

二十身出家四十心離塵得徑入大道乘此不退輪一
坐十五年林下秋復春春花與秋氣不感無情人我來
如有悟潛以心照身悞落聞見中憂喜傷形神安得遺

耳目冥然反天真

祇役駱口驛喜蕭侍御書至兼覩新詩吟諷通

宵因寄八韻

時為盪屋尉

日暮心無慆

連條切

吏役正營營忽驚芳信至復與新詩

并是時天無雲山館有月明月下讀數遍風前吟一聲
一吟三四歎聲盡有餘清雅哉君子文詠性不詠情使
我靈府中鄙怯不得生始知聽韶濩可使心和平

酬李少府曹長官舍見贈

低腰復斂手心體不遑安一落風塵下始知為吏難公
事與日長宦情隨歲闌惆悵青袍袖芸香無半殘賴有
李夫子此懷聊自寬兩心如止水彼此無波瀾往往簿
書暇相勸強為歡白馬晚蹋雪綠觴春暖寒戀月夜同
宿愛山晴可看野性自相近不是為同官

留別

秋涼卷朝簾春暖撤夜衾雖是無情物欲別尚沉吟況
與有情別別隨情淺深二年歡笑意一旦東西心獨留

誠可念同行力不任前事詎能料後期諒難尋唯有潺
湲淚不惜共沾衿

曉別

曉鼓聲已半離筵坐難久請君斷腸歌送我和淚酒月
落欲明前馬嘶初別後浩浩閭塵中何由見回首

北園

北園東風起雜花次第開心知須臾落一日三四來花
下豈無酒欲酌復遲迴所思眇千里誰勸我一杯

惜栢李花

花細而繁色艷而黯亦花中之有思者速衰易落故惜之耳

樹小花鮮妍香繁條軟弱高低二三尺重疊千萬萼朝
艷靄霏霏夕凋紛漠漠辭枝朱粉細覆地紅綃薄由來
好顏色常苦易銷鑠不見莨

魯堂切

蕩花狂風吹不落

照鏡

皎皎青銅鏡班班白絲鬢豈復更藏年實年君不信

新秋

西風飄一葉庭前颯已涼風池明月水哀蓮白露房其

奈江南夜絲絲自此長

夜雨

早蛩啼不歇殘燈滅又明
隔牕知夜雨芭蕉先有聲

秋江送客

秋鴻次第過哀猿朝夕聞
是日孤舟客此地亦離羣
濛濛潤衣雨漠漠冒帆雲
不醉潯陽酒煙波愁殺人

感遊寄遠

寄通州嚴侍御果州崔員外
澧州李舍人鳳州李郎中

昨日聞甲死今朝聞乙死
知識三分中二分化為鬼
逝

者不復見悲哉長已矣存者今如何去我皆萬里平生
知心者屈指能有幾通果澧鳳州眇然四君子相思俱
老大浮世如流水應歎舊交遊凋零日如此何當一杯
酒開眼笑相視

秋月

夜初色蒼然夜深光浩然稍轉西廊下漸滿南牕前況
是綠蕪地復茲清露天落葉聲策策驚鳥影翩翩棲禽
尚不穩愁人安可眠

白氏長慶集卷九

欽定四庫全書薈要卷一萬三千九百四十

集部

白氏長慶集卷十

唐白居易撰

感傷二古調詩五言凡七十八首

朱陳村

徐州古豐縣有村曰朱陳去縣百餘里桑麻青氤氲機梭聲札札牛驢走紆紆女汲澗中水男採山上薪縣遠官事少山深人俗淳有財不行商有丁不入軍家家守

村業頭白不出門生為陳村民死為陳村塵田中老與

幼相見何欣欣一村惟兩姓世世為婚姻

其村惟朱陳二姓而已

親疎居有族少長游有羣黃雞與白酒歡會不隔旬生
者不遠別嫁娶先近鄰死者不遠葬墳墓多遠村既安
生與死不苦形與神所以多壽考往往見玄孫我生禮
義鄉少小孤且貧徒學辨是非祇自取辛勤世法貴名
教士人重冠婚以此自桎梏信為大謬人十歲解讀書
十五能屬文二十舉秀才三十為諫臣下有妻子累上

有君親恩承家與事國望此不肖身憶昨旅游初迨今
十五春孤舟三適楚羸馬四經秦晝行有饑色夜寢無
安魂東西不暫住來往若浮雲離亂失故鄉骨肉多散
分江南與江北各有平生親平生終日別近者隔年聞
朝憂卧至暮夕哭坐達晨悲苦燒心曲愁霜侵鬢根一
生苦如此長羨陳村民

讀鄧魴詩

塵架多文集偶取一卷披未及看姓名疑是陶潛詩看

名知是君惻惻令我悲詩人多蹇厄近日誠有之京兆
杜子美猶得一拾遺襄陽孟浩然亦聞鬢成絲嗟君兩
不如三十在布衣擢第祿不及新婚妻未歸少年無疾
患苦盍切死於路岐天不與爵壽惟與好文詞此理勿
復道巧厯不能推

寄元九

晨雞纔發聲夕雀俄斂翼晝夜往復來疾如出入息非
徒改年貌漸覺無心力自念因念君俱為老所逼君年

雖較少顛顛謫南國三年不放歸炎瘴消顏色山無殺
草霜水有含沙蜮健否遠不知書多隔年得願君少愁
苦我亦加飡食各保金石軀以慰長相憶

秋夕

葉聲落如雨月色白似霜夜深方獨卧誰為拂塵床

夜雨

我有所念人隔在遠遠鄉我有所感事結在深深腸鄉
遠去不得無日不瞻望腸深解不得無夕不思量況此

殘燈夜獨宿在空堂
秋天殊未曉風雨正蒼蒼
不學頭陀法前心安可忘

秋霽

金木不相待炎涼雨中變
林晴有殘蟬巢冷無留燕
沉吟卷長簾愴惻收團扇
向夕稍無泥間步青苔院
月出砧杵動家家擣秋練
獨對多病妻不能理針線
冬衣殊未製夏服行將綻
何以迎早秋一杯聊自勸

歎老三首

晨興照青鏡形影兩寂寞少年辭我去白髮隨梳落萬
化成於漸漸衰看不覺但恐鏡中顏今朝老於昨人年
少滿百不得長歡樂誰謂天地心千齡與龜鶴吾聞善
醫者今古稱扁鵲萬病皆可治獨無治老藥

我有一握髮梳理何稠直昔似玄雲光今如素絲色匣
中有舊鏡欲照先歎息自從頭白來不欲明磨拭顰頭
與鶴頸至老常如墨獨有人髣髴不得終身黑

前年種桃核今歲成花樹去歲新嬰兒今年已學步但

驚物長成不覺身衰暮去矣欲何如少年留不住因書
今日意徧寄諸親故壯歲不歡娛長年當悔悟

送兄弟回雪夜

日晦雲氣黃東北風切切時從村南還新與兄弟別離
襟淚猶濕迴馬嘶未歇欲歸一室坐天陰多無月夜長
火消盡歲暮雨凝結寂寞滿爐灰飄零上階雪對雪畫
寒灰殘燈明復滅灰死如我心雪白如我髮所遇皆如
此頃刻堪愁絕迴念入坐忘轉憂作禪悅平生洗心法

正為今宵設

溪中早春

南山雪未盡陰嶺留殘白西澗冰已消春溜含新碧東
風來幾日蟄動萌草拆潛知陽和功一日不虛擲愛此
天氣暖來拂溪邊石一坐欲忘歸暮禽聲嘖嘖蓬蒿隔
桑棗隱映煙火夕歸來問夜餐家人烹薺麥

同友人尋澗花

聞有澗底花貫得村中酒與君來校遲已逢搖落後臨

觴有遺恨悵望空溪口記取花發時期君重攜手我生
日日老春色年年有且作來歲期未知身健否

登東村古塚

高低古時塚上有牛羊道獨立最高頭悠哉此懷抱回
頭向村望但見荒田草村人不愛花多種粟與棗自來
此村住不覺風光好花少鶯亦稀年年春閨老

夢裴相公

五年生死隔一夕魂夢通夢中如往日同直金鑾宮髣

髣金紫色分明冰玉容勤勤相眷意亦與平生同既寤
知是夢惘然情未終追想當時事何殊昨夜中自我學
心法萬緣成一空今朝為君子流淚一沾胸

晝寢

坐整白單衣起穿黃草履朝食鹽漱畢徐下階前步暑
風微變候晝刻漸加數院靜地陰陰鳥鳴新葉樹獨行
還獨卧夏景殊未暮不作午時眠日長安可度

別行簡

時行簡辟廬坦
劍南東川府

漠漠病眼花
星星愁鬢雪
筋力已衰憊
形影仍分訣
梓州二千里
劍門五六月
豈是遠行時
火雲燒棧熱
何言巾上淚
乃是腸中血
念此早歸來
莫作經年別

觀兒戲

齠

田聊切

齠

初謹切

七八歲綺紈三四兒
弄塵復鬪草盡日

樂嬉嬉堂上長年客
髻間新有絲一看竹馬戲
每憶童騃時童騃饒戲樂
老大多憂悲靜念彼與此
不知誰是癡

嘆常生

西村常氏子卧病不須臾前旬猶訪我今日忽云徂時
我病多暇與之同野居園林青藹藹相去數里餘村隣
無好客所遇惟農夫之子如何者往還猶勝無於今亦
已矣可為一長吁

寄元九

一病經四年親朋書信斷窮通各易交自笑知何晚元
君在荆楚去日唯云遠彼獨侶何人心如石不轉憂我

貧病身書來唯勸勉上言少愁苦下道加餐飯憐君為
謫吏窮薄家貧徧三寄衣食資數盈二十萬豈是貪衣
食感君心纏綿念我口中食分君身上暖不因身病久
不因命多蹇平生親友心豈得知深淺

以鏡贈別

人言似明月我道勝明月明月非不明一年十二缺豈
如玉匣裏如水常清徹月破天閭時圓明獨不歇我慙
貌醜老繞髻班班雪不如贈少年迴照青絲髮因君千

里去持此將為別

城上對月期友人不至

古人惜晝短勸令秉燭遊況此迢迢夜明月滿西樓復
有樽中酒置在城上頭期君君不至人月兩悠悠照水
煙波白照人肌髮秋清光正如此不醉即須愁

念金鑾子二首

衰病四十身嬌癡三歲女非男猶勝無慰情時一撫一
朝捨我去魂影無處所況念天札時嘔啞初學語始知

骨肉愛乃是憂悲聚唯思未有前以理遣傷苦忘懷日
已久三度移寒暑今日一傷心因逢舊乳母

與爾為父子八十有六旬忽然又不見邇來三四春形
質本非實氣聚偶成身恩愛元是妄緣合暫為親念茲
庶有悟聊用遣悲辛暫將理自奪不是忘情人

對酒

人生一百歲通計三萬日何況百歲人人間百無一賢
愚共零落貴賤同理沒東岱前後魂北邙新舊骨復聞

藥誤者為愛長生術又有憂死者為貪政事筆藥悞不
得老憂死非因疾誰言人最靈知得不知失何如會親
友飲此杯中物能沃煩慮消能陶真性出所以劉阮輩
終年醉兀兀

渭村雨歸

渭水寒漸落離離蒲稗

薄賣切

苗間傍沙邊立看人刈葦

苔近水風景冷晴明猶寂寥復茲夕陰起野思重蕭條
蕭條獨歸路暮雨濕村橋

諭懷

黑頭日已白白面日已黑人生未死間變化何終極常
言在已者莫若形與色一朝改變來止過不能得況彼
身外事悠悠通與塞

喜友至留宿

村中少賓客柴門多不開忽聞車馬至云是故來况
值風雨夕愁心正悠哉願君且同宿盡此手中杯人生
開口笑百年都幾回

西原晚望

花菊引閒步行上西原路原上晚無人因高聊四顧南
陌有烟火北陌連墟墓村鄰何蕭條近者無百步吾廬
在其下寂寞風日暮門外轉枯蓬籬根伏寒兔故園汙
水上離亂不堪去近歲始移家飄然此村住新屋五六
間古槐八九樹便是衰病身此身終老處

感鏡

美人與我別留鏡在匣中自從花顏去秋水無芙蓉經

年不開匣紅塵覆青銅今朝一拂拭自顧顛顛容照罷
重惆悵背後雙盤龍

村居卧病二首

戚戚抱羸病悠悠度朝暮夏木纔結陰秋蘭已含露前
日巢中卵化為雛飛去昨日穴中蟲蛻切輸芮為蟬上樹

四時未嘗歇一物不暫住唯有病客心沉然獨如故

新秋久病客起步村南道盡日不逢人蟲聲徧荒草西
風吹白露野綠秋仍早草木猶未傷先傷我懷抱未顏

與玄髯强健幾時好況為憂病侵不得依年老
種黍三十畝雨來苗漸大種薤二十畦秋來欲堪刈望
黍作冬酒留薤為春菜荒村百物無待此養衰瘵葺廬
備陰雨補褐防寒歲病身知幾時且作明年計

沐浴

經年不沐浴塵垢滿肌膚今朝一澡濯衰瘦頗有餘老
色頭鬢白形骸肢體虛衣寬有賸帶髮少不勝梳自問
今年幾春秋四十初四十已如此七十復何如

金史四庫全書
卷十
栽松二首

小松未盈尺心愛手自移蒼然澗底色雲濕煙霏霏栽
植我年晚長成君性遲如何過四十種此數寸株得見
成陰否人生七十稀

愛君抱晚節憐君含直文欲得朝朝見堦前故種君知
君死則已不死會凌雲

病中友人相訪

卧久不記日南牕昏復昏蕭條草簷下寒雀朝夕聞強

扶牀前杖起向庭中行偶逢故人至便當一逢迎移榻就斜日披裘倚前楹閒談勝服藥稍覺有心情

自覺二首

四十未為老憂傷早衰惡前歲二毛生今年一齒落形骸日損耗心事同蕭索夜寢與朝食其間味亦薄同歲崔舍人容光方灼灼始知年與貌衰盛隨憂樂畏老老轉逼憂病病彌縛不畏復不憂是除老病藥

朝哭心所愛暮哭心所親親愛零落盡安用身獨存幾

許平生歡無限骨肉恩結為腸間痛聚作鼻頭辛悲來
四肢緩泣盡雙眸昏所以年四十心如七十人我聞浮
圖教中有解脫門置心為止水視身如浮雲抖擻垢穢
衣度脫生死輪胡為戀此苦不去猶逡巡迴念發弘願
願此見在身但受過去報不結將來因誓以智慧水永
洗煩惱塵不將恩愛子更種悲憂根

夜雨有念

以道治心氣終歲得晏然何乃戚戚意忽來風雨天既

非慕榮顯又不恤饑寒胡為苦不樂抱膝殘燈前形影
間相問心默對以言骨肉能幾人各在天一端吾兄寄
宿州吾弟客東川南北五千里吾身在中間欲去病未
能欲住心不安有如波上舟此縛而彼牽自我向道來
於今六七年鍊成不二性消盡萬千緣惟有恩愛火往
往猶熬煎豈是藥無效病多難盡蠲

寄楊六

楊攝萬年縣尉
予為贊善大夫

青宮官冷靜赤縣有繁劇一間復一忙動作經時隔清

觴久未酌白日頓虛擲念此忽跼蹐悄然心不適豈無
舊交結久別或遷易亦有新往還相見多形迹唯君於
我分堅久如金石何況老大來人情重婚戚會稀歲月
急此事真可惜幾回開口笑便到髭鬚白公門苦鞅掌
盡日無間隙猶冀乘暝來靜言同一夕

送春

三月三十日春歸日復暮惆悵問春風明朝應不住送
春曲江上春春東西顧但見撲水花紛紛不知數人生

似行客兩足無停步日日進前程前程幾多路
兵刃與水火盡可違之去唯有老到來人間無避處
感時良為已獨倚南池樹今日送春心心如別親故

哭李三

去年渭水曲秋時訪我來今年常樂里春日哭君回
哭君仰問天天意安在哉若必奪其壽何如不與才
落然身後事妻病女嬰孩

別李十一後重寄

自此後詩在江州路上作

金馬詔聯秉諫臣筆共上青雲梯中途一相失江湖我方往朝廷君不出
蕙帶與華簪相逢是何日

初出藍田路作

停驂問前路路在秋雲裏蒼蒼縣南道去途從此始絕頂忽盤上衆山皆下視下視千萬峰峰頭如浪起朝經韓公坂夕次藍橋水潯陽僅四千始行七十里人煩馬

蹄跂勞苦已如此

仙娥峯下作

我為東南行始登商山道商山無數峯最愛仙娥好差
參樹若插過合切匣雲如抱渴望寒玉泉香聞紫芝草

青崖屏削碧白石牀鋪縞向無如此物安足留四皓感
彼私自問歸山何不早可能塵土中還隨衆人老

微雨夜行

漠漠秋雲起悄悄夜寒生但覺衣裳濕無點亦無聲

再到襄陽訪問舊居

昔到襄陽日髣髴方有髭今過襄陽日髭髻半成絲舊
遊都是夢乍到忽如歸東郭蓬蒿宅荒涼今屬誰故知
多零落間井亦遷移獨有秋江水煙波似舊時

寄微之三首

江州望通州天涯與地末有山萬丈高有江千里濶間
之以雲霧飛鳥不可越誰知千古險為我二人設通州
君初到鬱鬱愁如結江州我方去迢迢行未歇道路已

乖隔音信日斷絕因風欲寄語地遠聲不徹生當復相逢死當從此別

君遊襄陽日我在長安住君今在通州我過襄陽去襄陽九里郭樓雉連雲樹顧此稍依依是君舊遊處蒼茫蒹葭水中有得陽路此去更相思江西少親故

去國日已遠喜逢物似人如何含此意江上坐思君有如河嶽氣相合方氛氲狂風吹中絕兩處成孤雲風迴終有時雲合豈無因努力各自愛窮通我爾身

喜逢一作稀逢

舟中夜雨

江雲闇悠悠江風冷修修夜雨滴船背風浪打船頭船中有病客左降向江州

夜聞歌者

宿鄂州

夜泊鸚鵡洲秋江月澄徹鄰船有歌者發調堪愁絕歌罷繼以泣泣聲通復咽尋聲見其人有婦顏如雪獨倚帆檣立娉婷十七八夜淚如真珠雙雙墮明月借問誰家婦歌泣何淒切一問一沾襟低眉終不說

江樓聞砧

江州作

江人授衣晚十月始聞砧
一夕高樓月萬里故園心

宿東林寺

經牕燈焰短僧爐火氣深
索落廬山夜風雪宿東林

憶洛下故園

時淮汝寇
戎未滅

潯陽遷謫地洛陽離亂年
煙塵三川上炎瘴九江邊
鄉心坐如此秋風仍颯然

贈別崔五

朝送南去客暮迎北來賓孰云當大路少遇心所親勞
者念息肩熱者思濯身何如獨愁日忽見平生人平生
已不淺是日重殷勤問從何處來及此江亭春江天春
多雲夜月隔重陰移樽樹間飲燈照花紛紛一會不易
得餘事何足云明旦又分手今夕且歡忻

春晚寄微之

三月江水濶悠悠桃花波年芳與心事此地兩蹉跎南
國方譴謫中原正兵戈眼前故人少頭上白髮多通州

更迢遞春盡復如何

漸老

今朝復明日不覺年齒暮白髮逐梳落朱顏辭鏡去
當春頗愁寂對酒寡歡趣遇境多愴辛逢人益敦故形質
屬天地推遷從不住所怪少年心消磨落何處

送幼史

淮右冠未散江西歲再徂故里干戈地行人風雪塗
此時與爾別江畔立踟躕

夜雪

已訝衾枕冷復見牕戶明夜深知雪重時間折竹聲

寄行簡

鬱鬱眉多斂默默口寡言豈是願如此舉目誰與歡去
春爾西征從事巴蜀間今春我南謫抱疾江海壖

而緣切

相去六千里地絕天邈然十書九不達何以開憂顏渴
人多夢飲饑人多夢食春來夢何處合眼到東川

首夏

孟夏百物滋動植一時好麋鹿樂深林蟲蛇喜豐草翔
禽愛密葉游鱗悅新藻天和遺漏處而我獨枯槁一身
在天末骨肉皆遠道舊國無人來冠戎塵浩浩憂沉竟
何益祇自勞懷抱不如放身心冥然任天造潯陽多美
酒可使杯不燥湔魚賤如泥烹炙無昏早朝飯山下寺
暮醉湖中島何必歸故鄉茲焉可終老

孟夏思渭村舊居寄舍弟

嘖嘖雀引雛稍稍笋成竹時物感人情思我故鄉曲故

園渭水上十載事樵牧手種榆柳成陰陰覆墻屋免隱
豆苗肥鳥鳴桑椹熟前年當此時與爾同遊矚詩書課
弟姪農圃資童僕日暮麥登場天晴蠶折簇弄泉南澗
坐待月東亭宿興發飲數杯悶來棊一局一朝忽分散
萬里仍羈束并鮒思反泉籠鶯悔出谷九江地卑濕四
月天炎燠苦雨初入梅瘴雲稍含毒泥秧水畦稻灰種
畬田粟已訝殊歲時仍嗟異風俗間登郡樓望日落江
山綠歸雁拂鄉心平湖斷人目如我方漂泊舊里君幽

獨何時同一瓢飲水心亦足

早蟬

六月初七日江頭蟬始鳴石楠深葉裏薄暮兩三聲一
催衰鬢色再改故園情西風殊未起秋思先秋生憶昔
在東掖宮槐花下聽今朝無限思雲樹遠溼城

感情

中庭曬服翫忽見故鄉履昔贈我者誰東隣蟬娟子因
思贈時語特用結終始永願如履綦雙行復雙止自吾

謫江郡漂蕩三千里為感長情人提攜同到此今朝一
惆悵反覆者未已人隻履猶雙何曾得相似可嗟復可
惜錦表繡為裏况經梅雨來色黯花草死

南湖晚秋

八月白露降湖中水方老旦夕秋風多裒荷半傾倒手
攀青楓樹足蹋黃蘆草慘淡老容顏零落秋懷抱有兄
在淮楚有弟在蜀道萬里何時來煙波白浩浩

郡廳有樹晚榮早凋人不識名因題其上

潯陽郡廳後有樹不知名秋先梧桐落春後桃李榮五
月始榮動八月已凋零左右皆松桂四時鬱青青豈量
雨露恩沾濡不均平榮枯各有分天地本無情而我亦
相類早衰向晚成形骸少多病三十不豐盈毛鬢早改
變四十白髭生誰教兩蕭索相對此江城

感秋懷微之

葉下湖有波秋風此時至誰知落心先納蕭條氣推
移感時歲漂泊思同志昔為煙霞侶今作泥塗吏白鷗

毛羽弱青鳳文章異各閉一籠中歲晚同顛顛

因沐感髮寄朗上人二首

年長身轉慵百事無所欲乃至頭上髮經年方一沐
沐稀髮苦落一沐仍半禿短鬢經霜蓬老面辭春木強年
過猶近衰相來何速應是煩惱多心焦血不足

漸少不滿把漸短不盈尺况茲短少中日夜落復白既
無神仙術何除老死籍祇有解脫門能度哀苦厄掩鏡
望東寺降心謝禪客衰白何足言剃落猶不惜

早蟬

月出先照山風生先動水亦如早蟬聲先入聞人耳一
聞愁意結再聽鄉心起渭上新蟬聲先聽渾相似衡門
有誰聽日暮槐花裏

苦熱喜涼

經時苦炎熱心體但煩倦白日一何長清秋不可見歲
功成者去天數極則變潛知寒燠間遷次如乘傳火雲
忽朝斂金風俄夕扇簟枕遂清涼筋骸稍康健因思望

月侶好卜迎秋宴竟夜無客來引杯還自勸

早秋晚望無呈韋侍郎

九派繞孤城城高生遠思人煙半在船野水多於地穿
霞日脚直驅雁風頭利去國來幾時江上秋三至夫君
亦淪落此地同漂寄憫然向隅心摧頽觸籠翅且謀眼
前計莫問胷中事潯陽酒甚濃相勸時時醉

司馬宅

雨徑綠蕪合霜園紅葉多蕭條司馬宅門巷無人過唯

對大江水秋風朝夕波

司馬聽獨宿

荒涼滿庭草偃亞侵簷竹府吏下廳簾家僮開被幞數
聲城上漏一點牕前燭官曹冷似冰誰肯來同宿

夢與李七庾三十三同訪元九

夜夢歸長安見我故親友損之在我左順之在我右云
是二月天春風出攜手同過靖安里下馬尋元九元九
正獨坐見我笑開口還指西院花仍開北亭酒如言各

有故似惜歡難久神合俄頃間神離久伸後覺來疑在
側求索無所有殘燈影閃牆斜月光穿牖天明西北望
萬里君知否老去無見期踟躕搔白首

秋槿

風露颯已冷天色亦黃昏中庭有槿花榮落同一晨秋
開已寂寞夕殞何紛紛正憐少顏色復嘆不逡巡感此
因念彼懷哉聊一陳男兒老富貴女子晚婚姻頭白始
得志色衰方事人後時不獲已安得如青春

答元郎中楊員外喜烏見寄

四十四
字成

南宮鴛鴦地何忽烏來止故人錦帳郎聞烏笑相視疑
烏報消息望我歸鄉里我歸應待烏頭白慚愧元郎悞
歡喜

白氏長慶集卷十